

四庫全書

子部

欽定四庫全書

喻林卷九十三

明 徐元太 撰

學業門

三

博古

天在山中大畜君子以多識前言往行以畜其德易大畜  
聽遠音者聞其疾而不聞其舒望遠者察其貌而不察  
其形立乎定哀以指隱桓隱桓之日遠矣

設梁桓公  
十四年

食肉不食馬肝不為不知味言學者無言湯武受命不

為愚史記儒

林傳

書非史記周圖仲尼不采道非虛無自然嚴平不演海  
以受淤歲一蕩清君子博識非禮不視蜀志秦

必傳

仲尼嚴平會聚衆書以成春秋指歸之文故海以合流  
為大君子以博識為弘蜀志秦

宓傳

視漢臣之三篋似涉蒙山對梁相之五車若吞雲夢隋書

崔廓隱  
逸傳

上學以神聽中學以心聽下學以耳聽以耳聽者學在

皮膚以心聽者學在肌肉以神聽者學在骨髓

文子  
道德

天下無粹白狐而有粹白之裘掇之衆白也善學者若

齊王之食雞必食其蹠數千而後足

淮南子  
說山訓

昔者蒼頡作書容成造厯胡曹為衣后稷耕稼儀狄作酒奚仲為車此六人者皆有神明之道聖智之迹故人作一事而遺後世非能一人而獨兼有之各悉其知貴其所欲達遂為天下備今使六子者易事而明弗能見者何萬物至衆而知不足以奄之周室以後無六子之

賢而皆修其業當世之人無一人之才而知其六賢之道者何教順施續而知能流通由此觀之學不可已明

矣淮南子  
修務訓

有鳥將來張羅待之得鳥者一目也今為一目之羅無時得鳥矣道雖要也非博無以通矣博其方約其說荀子

子時事

道之於心也猶火之於人目也中穿深室幽黑無見及設盛燭則百物彰矣此則火之耀也非目之光也而目

假之則為明矣天地之道神明之為不可見也學問聖  
典心思道術則皆來覩矣此則道之材也非心之明也  
而人假之則為已知矣是故索物於夜室者莫良於火

索道於當世者莫良於典典者經也

潛夫論  
讀學

人目不見青黃曰盲耳不聞宮商曰聾鼻不知香臭曰  
癱癱聾與盲不成人者也人不博覽者不聞古今不見  
事類不知然否猶目盲耳聾鼻癱者也

王充論衡  
別道篇

人好觀圖畫者圖上所畫古之列人也見列人之面貌

與觀其言行置之空壁形容具存人不激勸者不見言

行也古賢之遺文竹帛之所載粲然豈徒牆壁之畫哉

王充論衡

別通篇

法令之家不見行事議罪不可審章句之生不覽古今

論事不實

王充論衡  
別通篇

耕夫多殖嘉穀謂之上農夫其少者謂之下農夫學士之才農夫之力一也能多種穀謂之上農能博學問謂

之上儒

王充論衡  
別通篇

大川旱不枯者多所疏也潢汙兼日不雨泥輒見者無

所通也是故大川相間小川相屬東流歸海故海大也

海不通於百川安得巨大之名夫人含百家之言猶海

懷百川之流也不謂之大者是謂海小於百川也

王充論衡

別通篇

如皆為用則多者為上少者為下累積千金比於一百

孰為富者

王充論衡自紀篇

大樂之成非取乎一音嘉膳之和非取乎一味聖人之

德非取乎一道故曰學者所以總羣道也羣道統乎已  
心羣言一乎已口唯所用之故出則元亨處則利貞默  
則成象語則成文述千載之上若共一時論殊俗之類  
若與同室度幽明之故若見其情原治亂之漸若指已  
效

徐幹中  
論治學

誠須所師必深必博猶涉滄海而撻水造長洲而伐木  
獨以力劣為患豈以物少為憂哉

抱朴子內篇  
感

古人歎息於才難故謂百世為隨踵不以璞非昆山而

棄耀夜之寶不以書不出聖而廢助教之言抱朴子外篇尚博

朱綠所以改素絲訓誨所以移蒙蔽披玄雲而揚大明則萬物無所隱其狀矣舒竹帛而考古今則天地無所藏其情矣抱朴子外篇尚學

涉若涉水獵若獵獸言歷覽之不專精也

前漢書註  
賈山傳

三墳五典八索九丘蓋聖人之陳迹耳子何好焉予曰上紀五帝之盛下述百王之義粲粲如列宿落落如連珠雖復退居窮處簞食瓢飲未始失其樂矣予可得無

好乎

太平御覽  
人事部樂

成少伯工吹竽見安昌侯張子夏鼓琴謂曰音不通于

曲以上不足以為知音

太平御覽  
樂部竽

夫觀書者譬猶登東嶽而知邱陵之巖崿也浮滄海而知江河之不廣也見日月而知衆星之照微也仰聖人而知衆說之少觀也

太平御覽  
學部教學

譬如大醫觀諸草木皆入醫方種種方便救治疾病皆

得差愈

无上內秘藏  
經顯道品

譬如王守藏者知王帑藏中金銀珠玉瑠璃珍寶有其

多少

那先比丘  
經卷上

### 存心

今夫蹶者趨者是氣也而反動其心

孟子公孫丑上

人有雞犬放則知求之有放心而不知求學問之道無他求其放心而已矣

孟子告子上

今有無名之指屈而不信非疾痛害事也如有能信之者則不遠秦楚之路為指之不若人也指不若人

則知惡之心不若人則不知惡此之謂不知類也

孟子告子

上

饑者甘食渴者甘飲是未得飲食之正也饑渴害之也  
豈惟口腹有饑渴之害人心亦皆有害人能無以饑渴  
之害為心害則不及人不為憂矣

孟子盡心上

山徑之蹊間介然用之而成路為間不用則茅塞之矣  
今茅塞子之心矣

孟子盡心下

人知求雞犬莫知求其心者惑也學問所以求之矣

趙氏

註孟子  
告子上

人之心莫隱乎慈莫便乎恕赤子匍匐使我心惻隱於慈故也凌波而先濟跋而望乎後之人便於恕故也此心之弗失焉可以事帝矣可以格天矣可以入道矣

子華子

中子軌

人中虛圓不徑寸神明舍焉事物交滑如理亂棼如涉驚浸一則以之怵惕一則以之忌諱一則以之懲創是則一日之間一時之頃而徑寸之地如炎如冰矣

子華子北

宮子  
仕

心胸之兩間其容幾何然則歷陸嶽嶧太行鴈門橫塞之靈臺之闊勺水之不通而奚以有容嗜欲炎之好憎水之炎與氷交戰焉則必兩相傷者矣

子華子  
執中

目視雕琢者明愈傷耳聞交響者聰愈傷心思玄妙者

心愈傷

闕尹子  
五鑑

次二植中樞周無隅測曰植中樞立督慮也

太玄經  
第一周

初一藏心於淵美厥靈根測曰藏心於淵神不外也

玄  
太

經第  
六養

六根不淨當洗其心心不受垢自無諸穢故心為宰官  
統御一切降伏其心猶馭猛虎如有縱急反傷汝身

虛皇

四十  
九章

譬如善調馬師隨馬懶悞即時能伏

大寶積經卷一百一十二

心如獮猴貪六欲故心如畫師能起種種業因緣故

大寶

積經卷一  
百一十二

無甘蔗子則無種種石蜜諸味若無菩提心者亦無種

種三寶諸味

大方等大集經卷九

以是正心能制諸惡如執鉤筭邪法不生

大方廣佛華嚴經卷

十二

發寶馬心離惱悞不調故發大車心載一切故發大象

心伏諸根故發大山心一切惡風不能動故發小犬心

離暝恚故

大方廣佛華嚴經卷五十八

菩提心者則為淨水洗濯一切煩惱垢故菩提心者則為大風一切世間無障礙故菩提心者則為盛火能燒

一切邪見愛故菩提心者則為淨日普照一切衆生類

故

大方廣佛華嚴經卷五十九

菩提心者則為利劍斬除一切煩惱惡故菩提心者則為金槌壞散一切憍慢山故

大方廣佛華嚴經卷五十九

菩提心者則為鋸斧斫伐無知諸苦樹故菩提心者則為器仗防護一切諸艱難故

大方廣佛華嚴經卷五十九

菩提心者則為勇健摧滅煩惱諸怨敵故菩提心者則為善鏃拔出一切煩惱刺故菩提心者則為尊主於餘

一切莫能勝故

大方廣佛華嚴經卷五十九

菩提心者則為淨燈普照一切諸法界故菩提心者則

為淨眼悉能覩見邪正道故菩提心者則為大道皆令

得入一切智城故

大方廣佛華嚴經卷五十九

菩提心者則為寶象悉能調伏一切根故菩提心者則

為寶馬遠離諸惡懶悞法故

大方廣佛華嚴經卷五十九

菩提心者則為沃燋消盡一切不善法故菩提心者則

為金剛壞散一切諸惡法故

大方廣佛華嚴經卷五十九

菩提心者則為如意珠具足一切功德利故菩提心者  
則為天德瓶滿足一切所欲樂故菩提心者則為劫初  
樹出生一切莊嚴具故菩提心者則為恒娑相衣不受  
一切諸塵垢故

大方廣佛華嚴經卷五十九

譬如飛鳥獮猴不適止一處也心所因不適止一處也

寶經推六  
佛遺目摩尼

人心溢盪猶如風電獮猴擲樹海波潮浪

蘓婆呼童子經卷上

如蟻守卵如犧牛愛尾如護一子如護一眼如巫師護

身如貧人護寶如海師護船

解脫道論  
卷一  
葉一

持心當如西方石石在中庭雨墮亦不能壞日炙亦不

能消風吹亦不能起

佛說阿含正行經敬六

意駛於響難護難禁

法句經  
心意品

藏六如龜防意如城慧與魔戰勝則無患

法句經  
心意品

諸善中獨有一心最第一人能一其心諸善皆隨之譬

如樓陛當有所倚諸為善者皆著一心

那先比丘  
經卷上

以能伏心如猫制鼠

禪要呵  
欲經

如馬不著轡勒左右噉草不肯進路若著轡勒則噉草

意斷隨人意去

大智度論  
卷六十八

心之可畏甚於毒蛇惡獸怨賊大火越逸未足喻也

動轉輕躁但觀於蜜不見深坑譬如狂象無鉤猿猴得樹騰躍踔躡難可禁制當急挫之無令放逸

遺教經論

離十

二

勿令放逸入於五欲譬如果牛之人執杖視之不令縱

逸犯人苗稼

遺教經論  
離十二

涵養

宋人有閔其苗之不長而揠之者芒芒然歸謂其人曰今日病矣予助苗長矣其子趨而往視之苗則槁矣天下之不助苗長者寡矣以為無益而舍之者不耘苗者也助之長者揠苗者也非徒無益而又害之

孟子公孫丑上

牛山之木嘗美矣以其郊於大國也斧斤伐之可以為美乎是其日夜之所息雨露之所潤非無萌蘖之生焉

牛羊又從而牧之是以若彼濯濯也人見其濯濯也以為未嘗有材焉此豈山之性也哉雖存乎人者豈無仁義之心哉所以放其良心者亦猶斧斤之於木也旦旦而伐之可以為美乎其日夜之所息平旦之氣其好惡與人相近也者幾希則其旦晝之所為有梏亡之矣牿之反覆則其夜氣不足以存夜氣不足以存則其違禽獸不遠矣人見其禽獸也而以為未嘗有才焉者是豈人之情也哉故苟得其養無物不長苟失其養無物不

消孟子告

子上

誠得其養若雨露於草木法度於仁義何有不長也誠失其養若斧斤牛羊之消草木利欲之消仁義何有不盡也

趙氏註孟子告子上

夫火热而水滅之金剛而火銷之木強而斧伐之水流而土遏之惟造物者物莫能勝也故中欲不出謂之局外邪不入謂之塞中局外閑何事之不節外閑中局何事之不成弗用而後能用之弗為而後能為之

淮南子主術訓

下

次二閑其藏固珍寶測曰閑其藏中心淵也

太玄經  
第一閑

風者陰陽亂氣激發而起者也猶人之內氣因喜怒哀

樂激越而發也

太平御覽  
天部九風

庾公造伯仁曰君何所欣悅而忽肥庾曰君復何所憂  
慘而忽瘠伯仁曰吾無所憂直是清虛日來滓穢日去

太平御覽  
人事部肥

嬰兒之姿貴養厚敦

西昇經

譬如畫石其文恒在畫水易滅勢不可住瞋恚難除譬  
如畫石善根易滅猶如畫水是故此心難得調伏如大  
火聚其明久住電光之明其光不停瞋如火聚慈如電

火是故此心難得調伏

元陽妙經卷五

煩惱之人堅牢難去真道之心輕浮易去譬如家犬不  
畏於人山林野鹿見人怖走瞋恚難去如守家犬慈心

易失猶如野鹿是故此心難可調伏

元陽妙經卷五

能令衆生善根成熟增長善芽

大方等大集經卷一

譬如調馬師馬有撓摟者當數數教之久後調好佛遺日摩

尼寶經

推六

猶如鬘師以水灑華使不萎枯潤澤鮮明

長阿含經卷十八

如良地有娑羅林彼中有守娑羅林人明健不懈諸娑羅根以時鋤掘平高填下糞沃溉灌不失其時若其邊有穢惡草生長盡拔棄之若有橫曲不調直者盡劄治之若有極好中直樹者便擁護養隨時鋤掘糞沃溉灌不失其時如是良地娑羅樹林轉茂盛好

中阿含經卷三十五

佛呼沙門問之汝處于家將何修為對曰恒彈琴佛言  
絃緩何如曰不鳴矣絃急何如曰聲絕矣急緩得中何  
如諸音普調佛告沙門學道雖然執心調適道可得矣

佛說四十二  
章經尺一

譬象調正可中王乘

法句經  
象喻品

制根從正如馬調御

法句經  
羅漢品

猶如穀種子入地即變易隨時溉灌萌芽得長

出曜經  
三受品

譬如王有守門者知王有所敬者知王有所不敬者知

有利王者知有不利王者守門者知王所敬者知利王者便內之知王不敬者知不利王者守門者即不內那先言人持意亦如是諸善者當內之諸不善者不當內守意制心譬亦如是

那先比丘  
經卷上

知色知相知刮刷知覆滄知作烟知好道知牛所宜處知好度濟知安隱處知留乳知養牛主若放牛人知此十一法能令牛羣蕃息

大智度論卷二

充才

有莊染然柔忍之木是維可以為弓之幹我乃縉被之  
以絲則有絃而成弓可以為弓明矣亦猶溫溫然寬柔  
之人是維可以為德之基我乃教訓之以學則有能而  
成德可以為法矣

毛詩正義抑

孔子曰野哉君子不可以不學見人不可以不飾不飾  
無貌無貌不敬不敬無禮無禮不立夫遠而有光者飾  
也近而逾明者學也譬之如洿邪水潦瀯焉莞蒲生焉  
從上觀之誰知其非源泉也

大戴禮記勸學

子路曰南山有竹不揉且直斬而用之達於犀革以此言之何學之有子曰栝而羽之鏃而礪之其入之不亦

深乎

孔子家語  
子路初見

良玉不琢資質潤美不待刻琢此亡異於達巷黨人不

學而自知也然則常玉不琢不成文章君子不學不成

其德

前漢書董仲舒傳

龍淵太阿出昆吾之金和氏之璧由井里之田礱之以砥礪錯之以他山故能致連城之價為命世之寶學亦

人之砥礪也

魏志文  
帝紀註

荆山之璞雖美不琢不成其寶顏冉之才雖茂不學不

弘其量

晉書景  
帝紀

班爾之妙曲木變容朱藍所染素絲改色

隋書李  
德林傳

若使貴遊之輩飾以明經可謂稽山竹箭加之以括羽

和之璧井里之厥也玉人琢之為天子寶

荀子  
大畧

且天生人也而使其耳可以聞不學其聞不若聾使其

北齊書  
儒林傳

目可以見不學其見不若盲使其口可以言不學其言  
不若爽使其心可以知不學其知不若狂故凡學非能  
益也達天性也

呂氏春秋  
秋尊師

夫瘠地之民多有心者勞也沃地之民多不才者饒也  
由此觀之知人無務不若愚而好學

淮南子  
修務訓

弓待檠而後能調劍待砥而後能利玉堅無敵鏤以為  
獸首尾成形鑿諸之功木直中繩樣以為輪其曲中規  
隱括之力唐碧堅忍之類猶可刻鏤樣以成器用又況

心意乎

淮南子  
修務訓

劍雖利不厲不斷材雖美不學不高雖有旨酒嘉殼不嘗不知其旨雖有善道不學不達其功故學然後知不足教然後知不究

韓詩  
外傳

雖有良玉不刻鏤則不成器雖有美質不學則不成

韓詩

外傳

砥所以致於刃學所以盡其才

鹽鐵論  
殊路

夫學者崇名立身之本也儀狀齊等而飾貌者好質性

同倫而學問者智

說苑建本

騏驥雖疾不遇伯樂不致千里干將雖利非人力不能

自斷焉烏號之弓雖良不得排檠不能自任人才雖高

不務學問不能致聖

說苑建本

學所以益才也礪所以致刃也吾嘗幽處而深思不若

學之速吾嘗跂而望不若登高之博見

說苑建本

有刀者礲諸有玉者錯諸不礲不錯馬攸用礲而錯諸

質在其中矣

揚子學行

工欲善其事必先利其器王欲宣其義必先讀其智易  
曰君子以多識前言往行以畜其德是以人之有學也  
猶物之有治也故夏后之璜楚和之璧雖有美璞卞和  
之資不琢不錯不離礎石夫瑚簋之器朝祭之服其始  
也乃山野之木蠶繭之絲耳使巧倕加繩墨而制之以  
斤斧女工加五色而制之以機杼則皆成宗廟之器黼  
黻之章可著於鬼神可御於王公而况君子敦貞之質  
察敏之才攝之以良朋教之以明師文之以禮樂道之

以詩書讚之以周易明之以春秋其有濟乎

潛夫論  
讚學

骨曰切象曰磋玉曰琢石曰磨切磋琢磨乃成寶器人

之學問知能成就猶骨象玉石切磋琢磨也

王充論衡  
量知篇

學猶飾也器不飾則無以為美觀人不學則無以有懿

德有懿德故可以經人倫為美觀故可以供神明故書

曰若作梓材既勤樸斲惟其塗丹艘

徐幹中  
論治學

馬雖有逸足而不閑輿則不為良駿人雖有美質而不  
習道則不為君子故學者求習道也若有似乎盡采玄

黃之色既著而純皓之體斯亡敝而不渝孰知其素歟

徐幹中  
論治學

南威青琴皎冶之極而必俟盛飾以增麗回賜游夏雖  
天才雋朗而實湏墳誥以廣智

抱朴子外  
篇博喻

泣血之寶仰鑑礧以摛景沉閭孟勞須楚砥以斂鋒騶  
驛侍王孫而致遠令質俟隱括而成德

抱朴子外  
篇博喻

文梓千雲而不可名臺榭者未加班輸之結構也天然  
爽朗而不可謂之君子者不識大倫之誠否也

抱朴子  
外篇勗

學

雖云色白匪染弗麗雖云味甘匪和弗美故瑤華不琢  
則耀夜之景不發丹青不治則純鈞之勁不就火則不  
鑽不生不扇不熾水則不決不流不積不深故質雖在  
我而成之由彼也

抱朴子外篇易學

吳斧質勁非笞羽而不美越劍性利非淬礪而不銛人  
性謾惠非積學而不成

劉子崇學

不登峻岑不知天之高不瞰深谷不知地之厚不遊六

藝不知智之源

劉子崇學

青出於藍而青於藍染使然也冰生於水而冷於水寒使然也鏡出於金而明於金瑩使然也戎夷之子生而同聲長而異語教使然也

劉子崇學

海蚌未剖則明珠不顯崑竹未斷則鳳音不彰情性未鍊則神明不發

劉子崇學

耳形完而聽不聞者聾也目形全而視不見者盲也人性美而不監道者不學也

劉子崇學

夫繭繅以為絲織為縑紈績以黼黻則王侯服之學為禮儀絲以文藻而世人榮之繭之不繅則素絲蠹於筐籠人之不學則才智腐於心胸

劉子崇學

譬諸金木金性苞水木性藏火故鍊金則水出鑄木而火生人能務學鑄鍊其性則才慧發矣

劉子崇學

不及盛年講肄道義使明珠加磨瑩之功荆璞發採琢之榮不亦良可惜乎

補文選戴  
邀學校疏

皎皎練練得藍則青得丹則赤得蘖則黃得涅則黑玉

不琢則南山之圓石

意林  
正部

水性雖能流不導則不通人性雖能智不教則不達學

猶植也不學將落

意林  
成敗志

象弭飾堂谿之材鷺羽加淇園之竹

文苑英華  
周宣帝檄一

明珠不瑩焉發其光寶玉不琢不成璋珪

太平御覽  
珍寶部珠下

鐵使平越之工鑄之以為劍而弗加砥礪則以刺不入擊不斷磨之以礮礪加之以黃砥則刺也無前擊也無下自是觀之礮之與弗礪其相去遠矣今人皆礪其劍

而弗知礪其身夫學身之砥礪也

太平御覽  
雜物部 磺

志不務學弗能成才如以盆盎之水求一山之形形不

可得則志由此惑

何氏語  
林識鑒

譬如有人遇得寶珠示治寶者言我此寶價直無量然其形色未甚光鮮汝當為我如法磨瑩但令鮮淨勿懷形色其治寶者隨彼所言依法專心如如磨瑩如是如是光色漸發乃至究竟映徹表裏既修治已價直無量

譬如茅種皆依地生由勤溉灌令芽生長

蘋婆呼童子經卷上

求明

誰能革濁清我灌溉誰能昭闇啟我童昧

後漢書傳教傳

不知而問堯舜無有而求天府先王之道則堯舜已六

二之博則天府已

荀子大畧

朱儒問徑天高於修人修人不知曰子雖不知猶近之

於我故凡問事必於近者

淮南子說山訓

通於學者若車軸轉轂之中不運於已與之致千里終

而復始轉無窮之源不通於學者若迷惑告之以東西

南北所居聆聆背而不得不知凡要

淮南子說山訓

太山之高背而弗見秋毫之末視之可察

淮南子說林訓

夫指之拘也莫不事申也心之塞也莫知務通也不明

於類也

淮南子泰族訓

人心必有明焉必有悟焉如火得風而炎熾如水赴下

而流速

徐幹中論治學

民之初載其矇未知譬如意寶在於玄室有所求而不見

白日照焉則羣物斯辨矣學者心之白日也

徐幹中論治學

苟得其要則八極之外如在指掌百代之遠有若同時不必在乎庭宇之左右俟乎瞻視之所及然後知之也

抱朴子外篇對俗

欲超千里於終朝必假追影之足欲凌洪波而遐濟必因艘楫之器欲見無外而不下堂必由之乎載籍欲測淵微而不役神必得之乎明師

抱朴子外篇最學

浚井不渫則混濁滋積嘉穀不芸則荑莠彌蔓學而不

思則疑閑實繁講肄不精則長惑喪功

抱朴子外篇博喻

登玄圃者悟丘阜之卑浮溟海者識池沼之褊披九典

乃覺牆面之駕蔽聞至道乃知拘俗之多迷

抱朴子外篇廣譬

幼而學者如日出之光老而學者如秉燭夜行猶賢乎  
瞑目而無見者也

顏氏家訓務學

耳之初窒目之始昧必不恠百金遭醫千里人不涉學  
猶心之聾盲不知遠祈明師以攻心術性之蔽也

劉子崇學

夫兩葉掩目則冥默無覩雙珠填耳必寂寥無聞葉作

目蔽珠為耳鰯二闕外擁視聽內隔固其宜也

劉子專學

天以神明光燭幽明照曜四方人以潛心鉤深致遠探

蹟索隱

揚子法言註問神篇

以明照物明盡則照窮而勿照之明猶無得之得無得而得斯為真得故勿照之明斯為真明矣演真明而廣照何止鑒窮沙界乎

李善註大選王簡棲頭陀寺碑文

人皆知滌其器莫知洗其心君子審其宗而後學明其道而後行

意林物論

登山小魯汎海難沂參珉見璧辯礧知璣

藝文類聚內典部內典頌

若風之吹雲明乎若見蒼天

黃帝素問靈樞經九鍼十二原

猶如半月漸見光明

元陽妙經卷二

亦如有人處於闇室執大炬火悉見諸物元陽法炬亦

復如是

元陽妙經卷九

如於暗室得大明燈普使一切得是光明

三十六部尊經上真經偈

猶如明鏡能見色象了了分明種種差別是鏡中象不可定說是有是無而亦得言鏡中有像一切衆生心鏡

明故見真道像又如止水無濤波故影現日月星辰飛鳥日月星辰及以飛鳥悉見水底一切諸物亦見自影了了分明此水物及所見影俱非真實不可言有不可言無一切衆生心水澄清見道身影亦復如是

靈寶秘  
密經

如燈破闇名之為滅

海空智藏  
經哀歎品

又如鑛中金治已轉增明

大寶積經  
卷二十八

譬如有鏡塵翳所覆或取拂末及以油灰磨拭令淨

大寶

猶如日月雲霧覆蔽猛風卒起吹令四散而此日月忽

然大明

大寶積經卷五十五

譬如小燈燭光或在壁或在室能滅大黑闇分

大寶積經卷一

百十

譬如千歲冥室未曾見明若然燈時闇寧有念我久住  
此不欲去耶

大寶積經卷一百一十二

譬如有人藥名無垢光若復有人用塗其眼眼得清淨一  
切暗色不能為障

大方廣佛華嚴經卷二

譬如日出光之所及衆闇咸除日沒光謝闇便如故

大乘

顯識經  
推三

譬如熱鐵團熱去鐵無損解脫者亦爾惑盡而清涼

大乘

密嚴經  
卷上

譬如室內久來有闇若將燈入即便闇滅

蘇婆呼童子經卷下

問慧者如冥中有燈火

佛說阿含正行經散六

譬如人有鏡不明不見形磨去其垢即自見形人已去

貪婬瞋恚愚癡譬如磨鏡

佛說阿含正行經散六

譬如日出衆冥皆索

修行道地  
經菩薩品

譬如日月以五事覆暗烟雲塵霧羅睺阿修羅手障則不能明照人心亦如是為五蓋所覆自不能利亦不能

益人

大智度論  
卷十七

治暗光明復有三種一在夜分謂星月等二在晝分謂

日光明三在俱分謂火珠等

瑜伽師地  
論卷十一

當知初明治三種暗一者夜暗二者雲暗三者障暗

瑜伽

師地論  
卷十一

千載闕疑從春永而俱泮一世顛倒與浮雲而俱開弘

集卷十

夫日舒則夜卷月生則陰滅燈之破暗猶慧之銷障法苑

珠林卷三十五



喻林卷九十三

欽定四庫全書

子部

喻林卷九十五

詳校官中書臣朱文翰

主事臣祁韻士覆勘

總校官原任中允臣王燕緒

校對官中書臣朱忻

謄錄監生臣潘璣

欽定四庫全書

喻林卷九十四

明 徐元太 撰

學業門

求道

射之有所準志志之主欲得中也必中所志乃為善耳  
以喻人將有行豫思念之行得其道為善耳尚書正義  
盤庚上  
玉不琢不成器人不學不知道是故古之王者建國君

民教學為先禮記

雖有嘉肴弗食不知其旨也雖有至道弗學不知其善  
也

禮記  
學記

道者開通性命猶如道路開通於人人行於道路不可  
須臾離也若離道則礙難不通猶善道須臾離棄則身  
有患者也

禮記正義  
中庸

誰能出不由戶何莫由斯道也

論語  
雍也

君子謀道不謀食耕也綏在其中矣學也祿在其中矣

君子憂道不憂貧

論語  
衛靈公

百工居肆以成其事君子學以致其道

論語子張

夫道若大路然豈難知哉人病不求耳

孟子告子下

道則高矣美矣宜若登天然似不可及也

孟子盡心上

雖有拱璧以先駟馬不如坐進此道

老子為道

古之知道者築壘以防邪疏源以毓真

子華子大道

不知道妄意卜者如射覆孟高之存金存玉中之存角  
存羽鼻之存瓦存石是乎非是乎惟置物者知之

闢尹子一

字

仰道者跂如道者駸皆知道之事不知道之道是以聖人不望道而歟不恃道而豐不惜道於聖不賈道於愚

關尹子  
一字

習射習御習琴習奕終無一事可以一息得者惟道無形無方故可得之於一息

關尹子  
一字篇

吾與汝既其文未既其實而固得道與衆雌而無雄而

又奚卵焉

莊子應  
帝王

向吾見若眉睫之間吾因以得汝矣今汝又言而信之

若規規然若喪父母揭竿而求諸海也

莊子庚桑楚

丘之於道也其猶醯雞與微夫子之發吾覆也吾不知

天地之大全也

莊子田子方

夫體道者天下之君子所繫焉今於道秋毫之端萬分

未得處一焉

莊子知北遊

夫人之在道若魚之在水得水而生失水而死

黃石公三略下

畧

道高比於天道明比於日道安比於山

賈子修政語上

聖人之與道猶葵之與日也雖不能與終始哉其鄉之誠也

淮南子說林訓

夫道有形者皆生焉其為親亦戚矣享穀食氣者皆受焉其為君亦惠矣諸有智者皆學焉其為師亦傳矣射者數發不中人教之以儀則喜矣又况生儀者乎

淮南子泰

族訓

求道者不以目而以心取道者不以手而以耳

說苑若道

棄常珍而嗜乎異饌者惡覩其識味也委大聖而好乎

諸子者惡覩其識道也

揚子

塗雖曲而通諸夏則由諸川雖曲而通諸海則由諸

易子

問道

稽其門闌其戶叩其鍵然後乃應況其否者乎

太玄經  
玄攤

近玄者玄亦近之遠玄者玄亦遠之譬若天蒼蒼然在於東面南面西面北面仰而無不在焉及其俯則不見

也天豈去人哉人自去也

太玄經  
玄攤

道之於人也其簡且易耳其修之也非若採金攻玉之

涉歷艱難也非若求盈司利之競逐囂煩也不要而遘不徵而盛

徐幹中論修本

凡探明珠不於合浦之淵不得驪龍之夜光也採美玉不於荆山之岫不得連城之尺璧也

抱朴子內篇祛惑

粗之與妙猶塗之夷險耳遊者豈嘗改其足哉

郭子莊子註在宥

今瞿鵩子方聞孟浪之言而便以為妙道之行斯亦無異見卵而責司晨之功見彈而求鴟矢之實也

郭子莊子齊注

論物

有鳥有鳥則飛於天有魚有魚則潛於淵知道者蓋默

默焉

文中子禮樂

玄闢難啓善捷易開

李善注文選王簡  
栖頭陀寺碑文

夫食稻梁進芻黍衣狐貉襲冰紝觀窈眇之奇舞聽雲  
和之琴瑟此生人之所急非有求而為也脩道德習仁  
義敦孝悌立忠貞漸禮樂之腴潤蹈先王之盛則此君  
子之所急非有求而為也

文選劉峻  
辨命論

棄餌取置而責功蹄筌失統喪歸而寄旨忘言

補文選  
李充學

歲

輪者車之跡檝者舟之羽身之須道如此二物

意林通語

得道者生六翮於背長毛羽於腹飛無階之蒼天度無

窮之世俗

意林仲長  
統昌言

夫人無幽顯道在則為尊雖生芻之賤也不能脫落君

子坪雅卉

物門芻

要乎哉問道昭乎其如日醒窘乎其如夜暝

黃帝素問  
靈樞經病

傳

昭乎哉問明乎哉道如鼓之應桴響之應聲也

黃帝素問內經

天元記  
大論

音樂有聲行者為之止住道言無味學者罕見留心嗟乎世人迷妄之甚但能淫聽有聲之聲詎能咀嚼無味之味耶

道德經註疏卷二

如蜂採花取其香味

元陽妙經卷五

譬如地有八味之水一切衆生而不能得有慧之人用

功穿鑿則便得水眞道亦爾譬如盲人不覩日月良醫  
療之而能得見如是日月非是今有真道亦爾元陽妙經卷九  
道猶良藥勤而服用定能愈疾有病不服稀能自愈五清

印品  
經法

若欲求火於木中求不於水中求若欲求道於身中求  
不於他求於冰求火他方求道假使力能移山功能竭  
海力之彌勤功之殊妙終劫行之去道愈遠大乘妙經  
捨身求道而不知道已在身中譬如愚人捨形求影默

聲求響而不知形是影根聲為響本

大乘妙林經

不知身心即是真道譬如愚人但見竹木而不知火捨木求火而不知火已在木中

大乘妙林經

其猶高山大澤非欲蟲魚鳥獸而蟲魚鳥獸歸之人能虛無無為非欲為道道自歸之矣

聖母資傳仙道

深山有寶名曰上勝人若取之則成富有衆生道性亦復如是

海空智藏經哀歎品

如追逝者尋跡能得是跡與人非一非異

靈寶祕密經

譬如有人欲食菴沒羅果或半娜婆果先取其子於良美田而種植之隨時溉灌守護營理漸次生長芽莖枝葉時節和合便有華果果成熟已取而食之

波羅蜜多經卷四百

十六

如重病思遇良醫如在大闇思見光明如溺大河思登彼岸如遭急難思求依護

大乘大方等日藏經卷一

譬病思良醫如飢思美饍

大方廣佛華嚴經卷二十三

譬如有人願欲得金處處求覓遂得金礦既得礦已即

便碎之擇取精者鑪中銷鍊得清淨金隨意迴轉作諸  
鐸釧種種嚴具雖有諸用金性不改

金光明最勝王經卷二

如雪山下有出淨光摩尼寶性有人善知摩尼寶相見

相則知即取持去

大法鼓經卷下

夫為道者譬如持炬火入冥室中其冥即滅而明猶存  
學道見諦愚癡都滅無不明矣

佛說四十二章經尺一

佛言人為道猶若食蜜中邊皆甜吾經亦爾其義皆快  
行者得道矣

佛說四十二章經尺一

佛言夫為道者猶木在水尋流而行不左觸岸亦不右  
觸岸不為人所取不為鬼神所遮不為洄流所住亦不  
腐敗吾保其入海矣人為道不為情欲所惑不為衆邪  
所誑精進無疑吾保其得道矣

佛說四十二章經凡一

譬如有人欲遠所詣即履昔人所行之道又被昔人所  
被之甲乃尋昔人舊所都城或行深山或行曠野行之  
不已到彼舊城其城廣大乃是往昔王之所都而此都  
城嚴麗依然池沼園苑皆悉殊好人之見者心無厭捨

我亦如是履於諸佛舊所行道被於諸佛所被舊甲行

詣諸佛涅槃舊城

佛說舊城經第八

如蜂集華不燒色香但取味去

法句經華香品第一

譬如大冶錮石然後得金

大智度論卷三十一

又如犢子周憇嗚呼得母乃止

大智度論卷三十二

穀實在榦中無人能受用時有須用者方便除皮榦竟

一乘寶性論卷一

不求魚兔之實競攻筌蹄之末

弘明集卷十二

但求夜光於巨海正自未得耳

弘明集宗答何書難白黑論

直心是道場無虛假故發行是道場能辦事故深心是道場增益功德故菩提心是道場無錯謬故布施是道場不望報故持戒是道場得願具故忍辱是道場於衆生心無閼故精進是道場不懈退故禪定是道場心調柔故智慧是道場現見諸法故慈是道場等衆生故悲是道場忍疲苦故喜是道場悅樂法故捨是道場憎愛斷故神通是道場成就六通故解脫是道場能背捨

故方便是道場教化衆生故四攝是道場攝衆生故多聞是道場如聞行故伏心是道場正觀諸法故三十七品是道場捨有為法故諦是道場不誑世間故緣起是道場無明乃至老死皆無盡故諸煩惱是道場知如實故衆生是道場知無我故一切法是道場知諸法空故降魔是道場不傾動故三界是道場無所趣故師子吼是道場無所畏故力無畏不共法是道場無諸過故三明是道場無餘闇故一念知一切法是道場成一切智

故維摩詰所說  
經菩薩品

道不須求經生死劫數苦盡自得如轉縷丸於高山縷  
盡自止何暇求耶

羅什譯維摩詰經弟子品

求益

風雷益君子以見善則遷有過則改易益

子夏傳云雷以動之風以散之萬物皆益

周易正義益

不學操縵不能安弦不學博依不能安詩不學雜服不

能安禮

禮記

夫學殖也不學將落

左傳昭公十八年

學如殖草木也令人日長日進猶草木之生枝葉也不學則才知日退將如草木之墜落枝葉也

春秋正義昭公十八年

人而不為周南召南其猶正牆面而立也

論語與陽貨

人之學也猶木之有枝葉也木有枝葉猶庇蔭人而況

君子之學乎

國語晉

千鈞之重加銖兩而移

史記仲尼弟子傳尼

學之資於人也其猶藍之染於素乎

魏志王朗子肅傳注

美寶為質雕摩益光不足以損

吳志虞  
翻傳

學之染人甚於丹青丹青吾見其久而渝矣未見久學而渝者也夫工人之染先修其質後事其色質修色積而染工畢矣學亦有質孝悌忠信是也

晉書虞  
溥傳

不學將落嘉植靡由

梁書武  
帝中紀

過繙為紺踰藍作青

北齊書  
魏收傳

吾嘗終日而思矣不如須臾之所學也吾嘗跂而望矣

不如登高之博見也

荀子  
勸學

不登高山不知天之高也不臨深谿不知地之厚也不聞先王之遺言不知學問之大也于越夷貊之子生而同聲長而異俗教使之然也

荀子勸學

學不可以已青出之於藍而青於藍冰水為之而寒於水木直中繩輮以為輪其曲中規雖有槁暴不復挺者輮使之然也故木受繩則直金就礪則利君子博學而日參省乎己則知明而行無過矣

荀子勸學

登高而招臂非加長也而見者遠順風而呼聲非加疾

也而聞者彰

荀子勸學

君子之學如蛻蟠然遷之故其行効其立効其坐効其置顏色出辭氣効

荀子大略

子贛季路故鄙人也被文學服禮義為天下列士學問不厭好士不倦是天府也

荀子大略篇

鄉也混然塗之人也俄而並乎堯禹豈不賤而貴矣哉鄉也效門室之辨混然曾不能決也俄而原仁義分是非圖迴天下於掌上而辨白黑豈不愚而知矣哉鄉也

胥靡之人俄而治天下之大器舉在此豈不貧而富矣

哉

荀子儒效篇

如垤而進吾與之如丘而止吾已矣今學曾未如翫贊  
則具然欲為人師

荀子省坐

善學者若齊王之食雞也必食其跖數千而後足雖不足猶若有跖物固莫不有長莫不有短人亦然故善學者假人之長以補其短被褐而出衣錦而入戎人生乎戎長乎戎而戎言不知其所受之楚人生乎楚長乎楚

而楚言不知其所受之今使楚人長乎戎戎人長乎楚  
則楚人戎言戎人楚言矣

呂氏春秋  
秋用衆

學聖王之道者譬其如日靜思而獨居譬其若火夫舍  
學聖之道而靜居獨思譬其若去日之明於庭而就火  
之光於室也然可以小見而不可以大知

賈子新書  
修政語上

夫以西施之美而蒙不潔則過之者莫不睨而掩鼻當  
試傅白櫟黑榆流波雜芷若籠蒙視治由笑佳態佻志  
從容為說焉則雖王公大人孰能無慄憚癢心而顛一

視之今以二三子材而蒙愚惑之智予恐過之有掩鼻

之容也

賈子新書勸學

夫純鈎魚腸劍之始下型擊則不能斷刺則不能入及  
加之砥礪摩其鋒鄂則水斷龍舟陸剝犀甲明鏡之始  
下型朦然未見形容及其粉以玄錫磨以白旃鬢眉微  
毛可得而察夫學亦人之砥錫也而謂學無益者所以  
論之過

淮南子修務訓

且夫身正性善發憤而成仁帽憑而為義性命可說不

待學問而合於道者堯舜文王也沉湎耽荒不可教以道不可喻以德嚴父弗能正嚴師不能化者丹朱商均也曼頰皓齒形夸骨佳不待脂粉芳澤而性可說者西施陽文也嚙臙哆鳴遠蔭戚施雖粉白黛黑弗能為美者嫫母仳仳也夫上不及堯舜下不及商均美不及西施惡不若嫫母此教訓之所喻也而芳澤之所施淮南子修

務  
訓

且聾者耳形具而無能聞也盲者目形存而無能見也

夫言者所以通已於人也聞者所以通人於已也瘡者

不言聾者不聞既瘡且聾人道不通故有瘡聾之病者

雖破家求醫不顧其費豈獨形骸有瘡聾哉心志亦有

之淮南子  
泰族訓

吾嘗深有思而莫之得也於學則寤焉吾嘗企有望而  
亦莫之見也登高則覩焉孔叢子  
雜訓

湯稱學聖王之道者譬如日焉靜居獨思譬如火焉夫  
捨學聖王之道若捨日之光何乃獨思若火之明也可

以見小耳未可用大知惟學問可以廣明德慧也

說苑建本

人皆知以食愈饑莫知以學愈愚

說苑建本

人知糞其田莫知糞其心糞田莫過利苗得粟糞心易

行而得其所欲

說苑建本

庭燎夜明追嗣日光

焦氏易林剝之大有

刻畫為飾毛嫱西施

焦氏易林升之井

造父疾趨百步而廢而託乘輿坐致千里水師汎軸解

維則溺自託舟楫坐濟江河是故君子者性非絕世善

自託於物也人之情性未能相百而其明智有相萬也此非其真性之材也必有假以致之也

潛夫論  
讚學

夫肥沃燒壘土地之本性也肥而沃者性美樹稼豐茂燒而壘者性惡深耕細鋤厚加糞壤勉致人功以助地利其樹稼與彼肥沃者相似類也地之高下亦如此焉以饅鍤鑿地以埋增下則其下與高者齊如復增饅鍤則夫下者不徒齊者也反更為高而其高者反為下

王充

論衡率性篇

蒸所與衆山之材幹同也伐以為蒸燻以火烟熱究決光色澤潤燄之於堂其耀浩廣火竈之效加也繡之未刺錦之未織恒絲庸帛何以異哉加五絲之巧施針縷之飾文章炫耀黻華蟲山龍日月學士有文章之學猶絲帛之有五色之巧也本質不能相過學業積聚超踰多矣

王充論衡  
量知篇

夫穀未春蒸曰粟銅未鑄鑠曰積石人未學問曰矇矇者竹木之類也夫竹生於山木長於林未知所入截竹

為筒破以為牒加筆墨之跡乃成文字大者為經小者為傳記斷木為檠枿之為板力加刮削乃成奏牘夫竹木麤直之物也雕琢刻削乃成為器用況人含天地之性最為貴者乎

王充論衡  
量知篇

銅錫未採在衆石之間工師鑿掘鑪橐鑄鑠乃成器未更鑪橐名曰積石積石與彼路畔之瓦山間之礎一實也

王充論衡  
量知篇

潤下作鹹水之滋味也東海水鹹流廣大也西州鹽井

源泉深也人或無井而食或穿井而不得泉有鹽井之利乎不與賢聖通業有高世之名難哉王充論衡  
別通篇

不出橫難不得從說不發苦詰不聞甘對導才低仰欲求裨也砥石剣厲欲求銛也王充論衡  
變動篇

倦立而思遠不如速行之必至也矯首而徇飛不如循雌之必獲也孤居而願智不如務學之必達也徐幹中論治學

夫聽黃鍾之聲然後知擊缶之細視袞龍之文然後知被褐之陋涉庠序之教然後知不學之困故學者如登

山焉動而益高如寤寐焉久而愈足顧所由來則杳然其遠以其難而懈之誤且非矣

徐幹中論治學

腥臊未化飲血茹毛以克其虛食之始也茹之火齊糴以蘭橘雖所未嘗嘗必美之適於口也蕡桴土鼓撫腹而吟足之蹈之以娛其喜樂之質也加之管絃雜以羽毛雖所未聽察之必樂當其心也

嵇中散集張遼叔自然好學論

泥涅可令齊堅乎金玉曲木可攻之以應繩墨百獸可教之以戰陳畜牲可習之以進退沈鱗可動之以聲音

機石可感之以精誠又況乎含五常而稟最靈者哉

抱朴子外篇

子外篇助學

低仰之駟教之功也鷙擊之禽習之馴也與彼凡馬野

鷹本實一類此以飾貴彼以質賤

抱朴子外篇助學

粉黛至則西施以加麗而宿瘤以藏醜經術深則高才

者洞逸鹵鈍者醒悞

抱朴子外篇助學

夫學者所以清澄性理簸揚埃穢雕鍛鑄璞礲鍊屯鈍

啟導聰明飾染質素抱朴

子外篇助學

登闕風捫晨極然後知井谷之間隘披七經玩百氏然

後覺面牆之至困也

抱朴子外篇助學

夫不學而求知猶願魚而無網焉雖勤而無獲矣廣博

以窮理猶順風而託焉體不勞而致遠矣

抱朴子外篇助學

雖長大而不學道侏侏然若未成之人也

太玄經第

林根增益益根而榦長求益之道也

太玄經第  
增解

山抱玉而草木潤焉川貯珠而岸不枯焉口納滋味而  
百節肥焉心愛典誥而五性通焉

劉子崇學

君子愛日以學及時而成難者不避易者不從旦就業夕自省可謂守業年三四十無藝則無藝矣年五十不以善聞則無聞矣鄙夫鄙婦相會於牆之陰可謂密矣明日或有知之故云執仁與義莫不聞也蓬生麻中不扶自直白沙在涅與之俱黑君子之遊苾乎如入蘭芷之室久而不聞則與之化矣小人之遊戲乎如入鮑魚之室久亦不聞而亦化矣故君子慎其去就也

意林  
曾子

人之學如渴而飲河海大飲則大盈小飲則小盈大觀

則大見小觀則小見意林物

理論

若不學譬如無目而視無脰而走無翅而飛無口而語

不可得也

意林正部

斷玉為器諭乎知道惟山出泉譬乎從學是以執射執  
御雖聖猶然為弓為箕不無以矣

藝文類聚人部鑒誠書

矯首伺飛不如修弋宛足念遠莫若驅驘故樸斲成於

丹彤篠蕩資於括羽

藝文類聚禮部學校啓

將使良璣修竹兼增瑩羽

藝文類聚職官部祭酒表

金鎔乃器水術伊瀾漸芳則馥履冰固寒

藝文類聚禮部釋真詩

醬成於鹽而鹹於鹽夫物之變有時而重

藝文類聚食物部醬

已漚為營未霑人功效謂之野營

埤雅卉物門白華

胸中無學猶手中無錢

文苑英華庾信連珠

夫學之於人猶土地之山川也珍寶於是乎出猶樹木  
之有枝葉本根於是乎庇也

太平御覽學部叙學

干將镆鋗巨闕辟閭古之良劍也然而不加砥礪則不  
能利不得人力則不能斷驛驅騏驥驥纖離驟耳此皆古

之良馬也然而必前有銜轡之制後有鞭策之威加之  
造父之御然後一日而致千里夫人雖有性質美而心  
辯智必將求賢師而事之

初學記人部師

人而不學命之曰視皮

一作肉

學而不行命之曰輒撮

一作撮

囊

因學紀聞卷十諸子

譬如鑄劍煅煉淬穢始見精鋼勇烈無滯當成妙器

虛皇

四  
十  
九  
章

如人種樹為得陰涼為得花果及以材木

元陽妙經卷九

猶如甘蔗噉嚼口中得於甘味我亦如是從聖人數聞  
經典多得法味

元陽妙經卷三

譬如有人飢渴欲求飲食疾病之人求於良醫苦惱之  
人求於救護

元陽妙經卷七

大師求法隨種種求隨種種有

海空智藏經捨受品

譬如良農三陽之時善役調牛鈎引懸澍隄捍綿密踏  
乘通濶加以好糞次選良種治擇蕪穢溫濕宜之然後  
調樹芸耗莠稗壅護苗根晨夕看視無令六畜侵食踐

踢如是苗子三月假生萋蔚繁盛水陸通美無有螢塍  
涼秋結實高下通熟即命童僕收藏貯積藏吏監守不  
令餘耗唯供食用儲備盈長家給豐足傍患貧乏

玉清道經

化四  
夷品

如吠瑠瑠若時若時匠者瑩拭尔時尔時光已轉淨波

羅

蜜多經卷五  
百八十四

譬如乳牛或噉乾草或噉濕草或飲冷水或飲煥水而  
能出於乳酪生酥熟酥尺以醍醐

大寶積經  
卷四十一

譬如有人於大火聚投以薪木數數添之如是添已其焰轉熾彌更增明無有盡滅

大寶積經卷九十五

如火焚燒時不厭於草木

大寶積經卷九十六

譬如有人得摩尼珠示其珠師珠師答曰此是無價真

摩尼寶即求師言為我治磨勿失光色珠師治已隨其

摩時珠色光明映徹表裏

大寶積經卷一百一十六

猶以琉璃寶瑩磨於真金光明轉清淨餘所不能及

大方

譬如真金以毗琉璃寶數數磨瑩轉更明淨

大方廣佛華嚴經卷

三十

譬如燈炷隨其精麁光明亦尔若益膏油光明轉增

大方

廣佛華嚴經

卷五十九

如酥未鑽搖酥終不可得是故諸智者鑽酪而得酥

大乘

密嚴經卷下

譬如真金得迦私藥著於火中轉增明淨

菩薩地持經卷七

譬如成鍊真金以摩尼珠寶莊嚴勝闕淨檀金

菩薩地持經卷

七

譬如成鍊真金鑿以碑礎光明清淨勝於餘金

菩薩持經卷

七

譬如燃燈因油因炷彼若無人更增益油亦不續炷是

為前已滅訖後不相續無所復受

中阿含經卷四十二

如人捨於簏食食百味飯食已充足復求勝者

長阿含經卷五

如策善馬進道能遠

法句經刀杖品

既自解慧又多學問漸進普廣油酥投水自無慧意不

好學問凝縮狹小酪酥投水

法句經廣衍品

譬如飽滿人得好食猶尚更食云何飢渴人而言不應

食論

大智度論卷三

譬如一燈能除諸暗得有所作更有大燈倍復明了

大智度論卷十

度論卷六

如人於暗室燃燈照諸器物皆悉分了更有大燈益復明審則知後燈所破之闇與前燈合住前燈雖與暗共住而亦能照物若前燈無暗則後燈無所增益

大智度論卷十

八

譬如破闇故然燈更有大燈明則轉勝當知先燈雖照  
微闇不盡若盡後燈則無用

大智度論  
卷七十九

既懷玉在中又匠以成器

弘明集  
卷十二

志惰

宰予晝寢子曰朽木不可雕也糞土之牆不可朽也

論語

治公

力不足者中道而廢今汝畫

雍也論語

蹠步不休跛鼈千里累土不輟邱山崇成厭其源開其  
瀆江河可竭一進一退一左一右六驥不致彼人之才  
性之相懸也豈若跛鼈之與六驥足哉然而跛鼈致之  
六驥不致是無他故焉或為之或不為之耳道雖邇不行  
不至事雖小不為不成其為人也多暇日者其出入不遠矣

荀子脩身

且子有弑父者然而天下莫疏其子何也愛父者衆也  
儒有邪辟者而先王之道不廢何也其行之者多也今

以為學者之有過而非學者則是以一飽之故絕穀不食以一蹟之難輶足不行惑也

淮南子修務訓

子之廢學若吾斷斯織也夫君子學以立名問則廣知是以居則安寧動則遠害今而廢之是不免於廝役而無以離於禍患也何以異於織績而食中道廢而不為寧能衣其夫子而長不乏糧食哉女則廢其所食男則隋於修德不為竊盜則為虜役矣

列女傳周列國鄒孟軻母

如有多人以諸鎧甲牢自莊嚴欲往討賊臨行陣時心

生恐怖則便退走

元陽妙經卷二

佛之經戒譬如寶瓶初聞精進所願必得後小懈慢忘經失戒譬如瓶破無所復得也

佛說生經卷五

譬如有人鑽木求火數數休息而不專一終不到之既不獲火唐勞其功其以懈心欲求無為譬猶亦然脩行道地

經集散品

昔有長者子入海取沈木積有年載方得一車持來歸家詣市賣之以其貴故卒無買者經歷多日不能得售

心生疲厭以為苦惱見人賣炭時得速售便生念言不如燒之作炭可得速售即燒為炭詣市賣之不得半車炭之價直世間愚人亦復如是無量方便勤行精進仰求佛果以其難得便生退心不如發心求聲聞果速斷生死作阿羅漢百喻經  
卷上

昔有一人病患委篤良醫占之云須恒食一種雉肉可得愈病而此病者市得一雉食之已盡更不復食醫於後時見便問之汝病愈未病者答言醫先教我恒食雉

是故今者食一雉已盡更不敢食醫復語言若前雉已

盡何不更食汝今云何止食一雉望得愈病

百喻經  
卷下

譬如渡河未到而還名爲不到彼岸

大智度論  
卷十二

懈怠之心燒諸功德譬如大火燒諸林野懈怠之人失

諸功德譬如被賊無復遺餘

大智度論  
卷十五

譬如鑽火數息無得火期

大智度論  
卷二十三

喻林卷九十四

欽定四庫全書

喻林卷九十五

明 徐元太 撰

學業門

五

神悟

知學如擷影知識如計夢

關尹子  
一字

金玉難捐土石易捨學道之士遇微言妙行慎勿執之

若執之則腹心之疾無藥可療

關尹子  
九藥

桓公讀書於堂上輪扁斲輪於堂下釋椎鑿而上問桓

公曰敢問公之所讀為何言邪公曰聖人之言也曰聖人  
在乎公曰已死矣曰然則君之所讀者古人之糟粕  
已夫臣也以臣之事觀之斲輪徐則甘而不固疾則苦  
而不入不徐不疾得之於手而應於心口不能言有數  
存焉於其間臣不能以喻臣之子臣之子亦不能受之  
於臣是以行年七十而老斲輪古之人與其不可傳也  
死矣然則君之所讀者古人之糟粕已夫

莊子  
天道

筌者所以在魚得魚而忘筌蹄者所以在兔得兔而忘

蹄言者所以在意得意而忘言

莊子外物

今夫达歲者終日求之而不得其得之非日益明也眸而見之也心之於慮亦然

荀子大畧

尹儒學御三年而不得焉苦痛之夜夢受秋駕於其師明日往朝其師望而謂之曰吾非愛道也恐子之未可與也今日將教子以秋駕尹儒反走北面再拜曰今昔臣夢受之先為其師言所夢所夢固秋駕已

呂氏春秋  
秋博志

剞劂銷鋸陳非良工不能以制木鑪橐埵坊設非巧治

不能以治金屠牛坦一朝解九牛而刀以剝毛庖丁用  
刀十九年而辦如新剖硎何則游乎衆虛之間若夫規  
矩鉤繩者此巧之具也而非所以巧也故瑟無絃雖師  
文不能以成曲徒絃則不能悲故絃悲之具也而非所  
以為悲也若夫工匠之為連錢運閑陰閑眩錯入於冥  
冥之眇神調之極游乎心手衆虛之間而莫與物為際  
者父不能以教子瞽師之故意相物寫神愈舞而形乎  
絃者兄不能以喻弟

淮南子齊俗訓

體粗者繫形知精者得神原始見終者有可推之緒得  
之未昧者無假物之因是以晝見天地未足稱明夜察  
分毫乃為絕倫抱朴子外篇博喻

羿無弧矢不能中微其中微者非弧矢也倕無斧斲不  
能善斷其善斷者非斧斲也劉子言苑

日月之明在乎天而所明在地易之神在乎道而所神  
在人也閻氏易傳神義

養由矯矢獸號于林蒲且榮繳神感飛禽末伎之妙動

物應心研精耽道安有幽深

文選張華勵志詩

事在外則易致妙在內則難精奚仲巧見於器故輪工能繼其致也伶倫妙在其神故樂人不傳其術也

文選陸士

連珠演衡

巧盡於器習數則貫道繫於神人达則滅是以輪匠肆目不乏奚仲之妙瞽史清耳而無伶倫之察

文選陸機演連珠

知者不言言者不知所以言者以音相聞譬如知音者識音以絃心知其音口不能傳

太平御覽道部

世多善弩而拙於弓弓無法准故任巧由意弩有法准

故易有善

太平御覽  
兵部弩

世尊一日示隨色摩尼珠問五方天王此珠而作何色時五方天王互說異色世尊復藏珠入袖却擡手曰此珠作何色天王曰佛手中無珠何處有色世尊歎曰汝何迷倒之甚吾將世珠示之便各彊說有色青黃赤白色吾將真珠示之便總不知

五燈會元七佛  
釋迦牟尼佛

今末世之刺也虛者實之滿者泄之此皆衆工所共知

也若夫法天則地隨應而動和之者若響隨之者若影道無鬼神獨來獨往

黃帝素問內經  
寶命全形論

聰明內作外若聾盲思慮玄起狀若癡狂故口不能言而意不能明也譬猶夢為君王履危臨深憂喜相反中心獨然覺而道之不能以喻其隣也

道德經指歸卷十

達於道者獨見獨聞獨為獨存父不能以授子臣不能以授君猶母之識其子嬰兒之識其親也夫子母相識有以自然也其所以然者知其不能陳也五味在口五

音在耳如甘非甘如苦非苦如商非商如羽非羽而易牙師曠有以別之其所以別之者而口不能言也

經道德

歸卷十

昔有梵志厥年二十天才自然事無大小過目則能自以聰哲而自誓曰天下技術要當盡知一藝不通則非明達也於是遊學無師不造六藝雜術天文地理醫方鎮厭山崩地動搏蒲博奕妓樂搏撮裁割衣裳文繡綾綺厨膳切割調和滋味人間之事無不兼達心自念曰

丈夫如此誰能及者試遊諸國摧伏抵對奮名四海技  
術衝天然後載功竹帛垂勲百代於是遊行往至一國  
入市觀視見有一人坐作角弓筋治角用手如飛作  
弓調快買者爭前即自念曰少來所學自以具足邂逅  
自輕不學作弓若彼鬪技吾則不如矣當從受學耳遂  
從弓師求為弟子盡心受學月日之中具解弓法所作  
巧妙乃踰於師布施財物奉辭而去去之一國當度江  
水有一船師用船若飛迴旋上下便疾無雙復自念曰

吾技雖多未曾習船雖為賤術其於不知宜當學之萬  
技悉備遂從船師願為弟子供奉盡敬竭力勞勤月日  
之中知其逆順御船迴旋乃踰於師布施財物奉辭而  
去復至一國國主宮殿天下無雙即自念曰作此殿匠  
巧妙乃余自隱遊來偶不學之若與競巧必不勝矣且  
當復學意乃足耳遂求殿匠願為弟子盡心供養執持  
斤斧月日之間具解尺寸方圓規矩雕文刻鏤木事盡  
知天才明朗事輒勝師布施所有辭師而去周行天下

遍十六大國命敵擒技獨言隻步無敢應者心自貢高  
曰天地之間誰有勝我者佛在祇植逢見此人應可化  
度佛以神足化作沙門拄杖持鉢在前而來梵志由來  
國無道法未見沙門怪是何人頃至當問須臾來到梵  
志問曰百王之則未見君輩衣裳制度無有此服宗廟  
異物不見此器君是何人形服改常也沙門答曰吾調  
身人也復問何謂調身於是沙門因其所習而說偈言  
弓匠調角水人調船巧匠調木智者調身譬如厚石風

不能移智者意重毀譽不傾譬如深淵澄靜清明慧人  
聞道心淨廓然於是沙門說此偈已身昇虛空還現佛  
身三十二相八十種好光明洞達照耀天地從虛空來  
下謂其人曰吾道德變化調身之力也於是其人五體  
投地稽首問曰願聞調身其有要乎佛告梵志五戒十  
善四等六度四禪三解脫此調身之法也夫弓船木匠  
六藝奇術斯皆綺飾華譽之事蕩身縱意生死之路也  
梵志聞之欣然信解願為弟子佛重為說四諦八解之

要尋時即得阿羅漢道

法句譬喻經  
二明哲品

心得

梓近輪輿之工能以規矩與人人之巧在心拙者雖得規矩之法亦不能成器也蓋喻人不志仁雖誦典憲不能以善

趙氏註孟  
盡心下

魯班不能說其手离朱不能說其目非言之難

魏志管輅傳註

列子學射中矣請於關尹子尹子曰子知子之所以中者乎對曰弗知也關尹子曰未可退而習之三年又以

報關尹子尹子曰子知子之所以中乎列子曰知之矣  
關尹子曰可矣守而勿失也非獨射也為國與身亦皆  
如之故聖人不察存亡而察其所以然列子說符

善為詩者不說善為易者不占善為禮者不相其心同  
也荀子大畧篇

夫內不開於中而強學問者不入於耳而不著於心此  
何以異於聾者之歌也效人為之而無以自樂也聲出  
於口則越而散矣是故不得於心而有經天下之氣者

是猶無耳而欲調鐘鼓無目而欲喜文章也亦不必勝

其任矣

淮南子原道訓

聖人終身言治所用者非其言也用所以言也歌者有詩然使人善之者非其詩也鸚鵡能言而不可使長是何則得其所言而不得其所以言故循迹者非能生迹

者也

淮南子說山訓

楚成王讀書於殿上而輪扁在下作而問曰未審主君所讀何書也成王曰先聖之書輪扁曰此真先聖王之

糟粕耳非美者也成王曰子何以言之輪扁曰以臣輪  
言之夫以規為圓矩為方此其可付乎子孫者也若夫  
合三木而為一應乎心動乎體其不可得而傳者也以  
為所傳真糟粕耳故唐虞之法可得而改也其喻人心  
不可及矣韓詩外傳

惟人心之所獨曉父不能以禪子兄不能以教弟也李善

註文選魏文帝典論論文

思一至饑一與之糧思一至渴一與之漿太平御覽道部養生

觀書每得一義如得一真珠船

因學記聞  
卷八孟子

仰青雲覩白日不覺為遠矣

何氏語  
林文學

得月而指自忘得意而言自息

法苑珠林  
卷九十九

或以事伏心或以理伏心今正觀則以無常等觀制伏

其心也

羅什譯維摩  
詰菩薩品

五通為象馬大乘為上車一心為御者游於人正道也

僧肇註維摩  
詰經佛國品

要成

汲水未出而覆喻修德未成而止所以致凶也

周易正義井

惟若農夫之考田已勞力布發之惟其陳列修治為其

疆畔畎畝然後功成

孔氏傳書梓材

雖奏樂於仁人而不使知達至順之理亦為未善猶如

人雖食五味而調和溫清不順則雖食不肥也

禮記正義禮運

人身體髮膚骨肉筋脉備足乃為成人若片許不備便

不為成人也

禮記正義禮器

由也升堂矣未入於室也

論語先進

不踐迹亦不入於室

論語  
先進

苗而不秀者有矣夫秀而不實者有矣夫

論語  
子罕

黍稷無成不能為榮黍不為黍不能蕃廩稷不為稷不能蕃殖所生不疑惟德之基

國語  
晉

謂石為獸射之洞開精之至也積歲解牛砉然游刃習之久也自非渾沌無可鑿之姿窮奇懷不移之情安有至精久習而不成功者焉

北齊書  
文苑傳

蘧伯玉行年六十而六十化未嘗不始於是之而卒訃

之以非也未知今之所謂是之非五十九非也

莊子則陽

百發一失不足謂善射千里蹠步不至不足謂善御倫

類不通仁義不一不足為善學

荀子勸學

學也者固學一之也一出焉一入焉塗巷之人也

荀子勸學

篇

學曰遲彼止而待我我行而就之則亦或遲或速或先

或後胡為乎其不可以同至也

荀子修身篇

夫驥一日而千里駕馬十駕則亦及之矣將以窮無窮

逐無極與其折骨絕筋終身不可以相及也將有所止

之則千里雖遠亦或遲或速或先或後胡為乎其不可

以相及也

荀子

日月之塗所行必到无有患晦

焦氏易林  
明夷之屯

臺榭不成未得安息

焦氏易林  
蹇之豐

垂秋布葉君子比德

焦氏易林  
鼎之蹇

或曰耕不穫獵不饗耕獵乎曰耕道而得道獵德而得

德是穫饗也

揚子  
學行

或曰亦有疾乎曰撫我華而不食我實

揚子

問明

禾粟之采生而不成者謂之董節

許氏說文卷七

匪惟撫華乃尋厥根宮牆重仞允得其門

蔡中郎集郭有道碑

射必能中畫必象人故曰審本

呂氏春秋處方解

夫彀勁弩者効力於發箭涉大川者保全於既濟井不達泉則猶不掘也一步未至則猶不往也

抱朴子內篇極言

夫修道猶如播穀也成之猶收積也厥田雖沃水澤雖美而為之失天時耕鋤又不至登稼被壟不穫不刈頃

畝雖多猶無穫也

抱朴子內篇極言

梁塵之盈尺非可求之漏刻山雷洞徹非可致之於造次也患於聞之者不信信之者不為為之者不終耳

抱朴子外篇守墳

子內篇至理

雖失之於暘谷而收之於虞淵方知良田之晚播愈於卒歲之荒蕪也

抱朴子外篇勗學

方將墾九典之蕪歲播六德之嘉穀厥田邈於上土之科其收盈乎天地之間何必耕也為務哉

抱朴子外篇守墳

夫學者猶種樹也春玩其華秋登其實講論文章春華

也修身利行秋實也

顏氏家訓勉學

天地以萬物為寶至秋而成也

莊子旨義庚桑楚

如彼南畝力未既勤藨耜致功必有豐殷

文選張華勵志詩

如彼樹芳實穎實發

文選顏延之祭屈原文

當埏埴以為器之時是土而異於土雖燥未燒遇濕猶壞燒而未熟不久尚毀火力既足表裏堅固河山可盡

此形無滅

藝文類聚靈異部仙道書

醍醐之教踰於佛性從乳出酪從酪出蘇從生蘇出熟蘇熟蘇出醍醐醍醐出蘇之精也

太平御覽  
釋部  
佛

仙者川也身者舟也濟川得岸何候舟為

太平御覽  
道部  
道

行之則至無謂道賒敦以秋實食以春華

初學記  
禮記  
冠

蘭室改蓬心旌岸變伊草丹青有必渝絲染豈常皓曲

轆且繩直詭木遂雕藻一簣或成山百里勸中道

初學記  
道

釋部  
佛註

二偏之病既除一中之藥還遣唯藥與病一時俱消

道

若山澤氣相蒸兮興雲為風雨泥竭遂成塵兮火滅化  
為土若蘖以染黃兮似藍成綠組皮革煮成膠兮麴孽  
化為酒參同契

披列枝條實核可觀參同契

知而能勤久而不怠如渡滄海日求著岸虛皇四十九章

未有學而不成未有種而不生

玉清經  
幽棲品

又如魚母多有胎子成就者少又如果樹華多實少

元

妙經

卷二

譬如從牛出乳從乳出酪從酪生酥從酥生甘美法味  
若有服者衆疾皆愈

元陽妙經卷二

譬如行客隔礙陽谷欲往彼岸无因得過假借舟航以  
濟沈溺既至彼岸向之舟航无所復用

大象妙林經

當須積學用心堅固若服食者中廢則疾若遁林澤中

廢則危

海空智藏經序品

譬如有人得度江海不經惡風安穩彼岸

海空智藏經普說品

譬如大象度駛流水窮盡源底得寶法相而入涅槃豈

可如獮猴諸鬼畏怖駛流趣自度身

大智度論三昧法門經卷下

如鳥未到所至終不中住

大智度論卷七十六

如四大河無熟池出未入大海終無住義

波羅密多經卷六百

譬如窑師能善調泥安布輪繩下上迴轉所造器物而  
得成就

大寶積經卷五十五

猶如有人乘大舟船欲渡大海時遇風濤鼓湧飄蕩竈

鼈鯢鯢互為嶮害是人因船遂達彼岸

大寶積經卷一百二十

譬如陶師未成器時不得器名

大方等大集經卷九

以正住四攝法為輪以真淨十善業為輻以淨功德資糧為轂以堅固淳至畢竟為轄轂釘鑄以善成就諸禪解脫三昧為轍以四無量心為善調以善知識為御者以知時非時為發動以無常苦空無我之旨為驅策以七覺寶繩為鞚勒以淨五根為索帶以弘普端直大悲為旒幢以四正勤為輶以四念處為安詳以四神足為速進以勝五力為鑒陣以八聖道為直進於一切衆生

無障礙慧明以為軒以無住六波羅蜜迴向薩婆若以  
無礙四諦度到彼岸是為大乘

大方等大集經卷十五

大藥正樹以過去所發成就一切智慧善法普覆一切  
諸衆生界除滅一切諸惡道苦廣大悲願而為其根於  
一切如來真實智慧種性中生堅固不動善巧方便以  
為其莖徧法界智諸波羅蜜以為其枝禪定解脫諸大  
三昧以為其葉總持辯才菩提分法以為其華究竟無  
變諸佛解脫以為其果

大方廣佛華嚴經卷十一

譬如男子渴極求水捨於平地穿鑿高原日日興功但見燥土積有時節其泉玄遠而不得水復於異時掘地甚多乃見泥水濁不可飲當柰之何其人不懈稍進得

水法華經  
卷六

譬如因牛有乳因乳有酪因酪有生酥因生酥有熟酥因熟酥有酥精酥精者於彼中為極第一中阿含經卷一

譬如抱雞抱其卵或五或十隨時消息愛護將養正復中間放逸猶能以爪以口啄卵得生其子所以者何以

彼雞母初隨時消息善愛護故

雜阿含經卷三十三

如數十人各持弓箭射垛中有前中者中有後中者射

不休息必復中準

佛殿泥洹經卷上

譬如陶家燒作瓦器盛水不漏凡人如坏得道如瓦可  
燥可濕浸漬不碎

佛說梵志阿飈經

譬如學射法初始甚難中以能中大准閉目破一毛

修行

道地經神足品

譬如賈客欲得水精之珠便入江海則得此寶并獲真

珠金剛珊瑚碑碣瑪瑙修道地經知人心念品

猶彼果樹隨時繁茂狂華生長遇風凋落結實者渺或以結實遇雹墮落或有未華而凋落者或有已華而凋落者其中成實待熟落者少少尔

出曜經卷一無常品

猶如張綜以杼投織漸盡其縷

出曜經卷一無常品

譬如迷人還得正路必定自知去舍不遠必無疑也

大方

等陀羅尼  
經卷四

如人趣河遙聞水聲必定自知吾今得水而無疑也

大方

等陀羅尼  
經卷四

譬如瓦器任用之時名之為熟如庵羅果等任取食時亦名為熟菩薩善戒

經卷三

皆有長者居甚大富衆寶備具唯無赤真珠以為不足便將人入海採珠經歷險阻乃到寶處刺身出血油囊裏之懸著海底珠蛤聞血香唼食之乃得出蚌剖蚌出珠採之三年方得一珮發還到海邊同伴見其得好寶欲共圖之俱行取水衆人推著井中覆之而去墮其井

底久其人見有師子從傍穴來飲水其人復惶怖師子去後尋孔而出還到本土其伴歸到家呼曰卿得吾一佩無人知兼欲見害卿可密盡相還吾終不言卿也其人怖慮盡還其珠珠主得已持還家有兩兒著珠共戲共相問曰此珠出生何處一兒曰生我囊中一兒曰生室甕中父見笑之婦曰何笑答曰吾取此珠勤苦乃余小兒依我得之不識本末謂生甕中佛告阿難汝但見我成佛不知我從無數劫學之勤苦至今乃得謂之為

易如彼嬰兒謂珠生囊中矣

衆經撰雜譬喻經

期至悉具足如月十五日

修行道地經五陰成敗品

若心欲住精勤莫廢如鑽火見烟掘井見濕必見不久

思惟要畧法

譬如穿井已見濕泥轉加增進必望得水又如鑽火已得見烟倍復力勵必望得火

大智度論卷十五

譬如度水初入是無疑出彼岸是決了

大智度論卷五十七

亦如真金被精進鎔以定為護以智慧箭能射毛百之

一所射皆中壞魔軍衆勇健無畏

論大莊嚴經卷十四

植德耘邪而薈蔚樹福灌正而扶疏

弘明集卷十一

譬之於射後破奪先

弘明集卷十二

六度中前三度屬福德業後三度屬慧明業二業具足

必至佛道譬如雨輪能有所至

羅什譯維摩詰經菩薩品

### 造士

倬音卓彼雲漢為章于天周王壽考遐不作人

詩大雅棫樸

鶩飛戾天魚躍于淵豈弟君子遐不作人

詩大雅旱麓

天將以夫子為木鐸

論語八佾

譬諸草木區以別矣君子之道焉可誣也

論語子張

羿之教人射必志於彀學者亦必志於彀大匠誨人必

以規矩學者亦必以規矩

孟子告子上

大匠不為拙工改廢繩墨羿不為拙射變其彀率

孟子盡心

上

梓匠輪輿能與人規矩不能使人巧

孟子盡心下

築築不可使俛戚施不可使仰僬僥不可使舉侏儒不

可使援矇矇不可使視嚚瘖不可使言聾聵不可使聽  
僮昏不可使謀質將善而賢良贊之則濟可矣也若有  
違質教將不入其何善之為

國語 晉

官師之所材也戚施直鑄遂篠蒙璆侏儒扶盧矇矇修  
聲聾聵司火僮昏嚚瘖僬僥官師所不材也以實裔土  
夫教者因體能質而利之者也若川然有原以印浦而

後大

國語 晉

為衢樽於上葉號木鐸於前修

魏書李順希仁弟騫傳

凡可無學而能者唯息與食也故先王傳道以相効屬

也

鶻冠子道端

夫教歌者使先呼而訛之其聲反清徵者乃教之

韓非子外

儲說上

觀君子者問鑄人不問鑄金或曰人可鑄歟曰孔子鑄

顏淵矣或人蹶爾曰旨哉問鑄金得鑄人

揚子學行

或問人有倚孔子之牆絃鄭衛之聲誦韓莊之書則引  
諸門乎曰在夷貉則引之倚門牆則麾之惜乎衣未成

而轉為裳也

揚子  
修身

率馬以驥不亦可乎

揚子  
修身

春木之菴兮援我手之鶴兮去之五百歲其人若存兮

揚子  
寡

見篇

千里之足困於鹽車之下赤刀之鑛不經歐冶之門者

抱朴子外  
篇崇教

夫受繩墨者無枉剗之木染道訓者無邪僻之人飭治

之術莫良乎學

抱朴子外  
篇崇教

振天惠以廣掃鼓九陽之洪爐運大鈞乎皇極開玄模  
以軌物陶冶庶類匠成翹秀蕩沃積埃革邪反正抱朴子外

篇勗

學

蜾蠃遇螟蠾而受化久乃變成蜂爾七十子之類仲尼  
又速於是揚子法言註學行篇

喜於問鑄金而得鑄人富莫大焉利莫重焉揚子法言註學行篇  
大匠之誨人也必以規矩君子之訓物也必以仁義揚子

法言註  
吾子篇

因人才質刻而畫之文而藻之

揚子法言  
註先知篇

春木茏然而生譬如孔氏啟導人心有似援手而進

揚子

法言註  
寡見篇

鑽蚌瑩珠剖石摛藻絲匪玄黃水因方圓引之斯流染

之斯鮮

補文選潘尼釋真頌

學猶蔣苗化若偃草

補文選潘尼釋真頌

孔子以四科教士隨其所善譬如市肆多列雜物欲置

之者並至

意林新論

若非六經庖厨百家異饌三墳為瑚璉五典為笙簧豈能暴以秋陽紓就望之景濯以江漢潘垂天之澤藝文類聚

禮部學  
校表

接光太陽燭之幽夜令欣流者濟津懷寶者剖和藝文類聚

禮部學  
校表

置樽候酌懸鐘待叩必須蘊朱藍以成彩立規矩以為

式藝文類聚職官部祭酒表

學媿聚沙問慙攻木

藝文類聚職官部祭酒表

仲尼門人鋪道醇飲道宗

太平御覽人  
事原闕德

尊者在世化導證果最多每度閼人以一籌置於石室其室縱十八肘廣十二肘克滿其間

五燈會元西  
天祖師二祖

贈人以財不若贈人善言黃金雖貴用之則窮善言於

心終身為寶

虛皇四  
十九章

吾道猶炬火取之無窮隨其所與能飪熟一切吾法等

泉源能灌溉枯槁潤澤一切

虛皇四  
十九章

譬如金在沙中陶鍊淬穢然後銷鎔成金之後價值無

量三十六部尊經仙人經

汝今有所疑滯我為大醫王為汝剖判深疑汝於道性  
猶未明了我有法炬能為照明汝今欲濟煩惱大河我  
能為汝作於舟楫元陽妙經卷九

譬如金師冶鍊真金先除麤垢次除微塵後得名為百  
鍊真金海空智藏經普說品

猶如藥師善解藥分復以妙藥教授其子諸餘外學受  
業之人悉不得見海空智藏經供獻品

法雨流澍廣潤心田無上道芽隨時增長

玉清經通濟幽冥品

如三染汁盛以一器所謂羅若鬱金青黛染三種物所

謂毳毾及憍奢耶衣毳以漿浸則成青色毾淨浣故成於

黃色憍奢耶衣先以灰浸則成赤色如是三物雖同一

器受色各異

大方等大集經卷十一

如工陶師埏埴調泥置之輪上隨意成器

大方等大集經卷二十三

譬如一兩阿羅婆藥變千兩銅以為真金於彼藥分無

所損減

大方廣佛華嚴經卷五十九

今欲說神呪除其三毒垢拔其愚癡足照以智慧鏡賜  
其禪定水生長菩提芽令到涅槃岸

七佛所說神呪經卷一

拔其毒鏃補智慧膏以薩婆若水洗除垢穢拂拭搓磨  
令心調淨

七佛所說神呪經卷三

愍念衆生佐佛化愚常以王法攝持守護於生死海拔  
濟令出身為大船口為法橋心為大海出慈悲水溉灌  
衆生枯槁福田悉令生長菩提根芽我所饒益其喻如

是

七佛所說神呪經卷三

能轉法輪吹大法螺擊大法鼓然大法燈施大法橋汎

大法船舉大法帆

無明羅  
刹經

以智慧藥籠初抉憍陳如等無明眼膜以大法雨滅優  
樓迦葉等煩惱熾火以知因緣最上智藥治舍利弗大  
目連等結使之病以此智鉤鉤摩訶迦葉入佛正道以  
法梯磴令大名娑羅門趣解脫堂

無明羅  
刹經

若有衆生能觀察者為作照明能安立衆生戒之平地  
得於念處以為止息涉正勤路上如意堂登五根樓入

五力室艸七覺香飲八正水坐於有餘涅槃之林觸於

四禪無漏涼風

無明羅  
剎經

殊流共委酌而不竭異軫同驚仰以知歸

正法念處經序

海中有大龍欲雨閻浮利地恐地無當此水者龍意念地無當我雨者還自雨海中耳佛惠弟子威德甚大欲以施外行九十六種道家恐無能堪者是故佛弟子展轉自相惠耳譬如龍自還雨海中也

舊雜譬  
喻經

菩薩度人譬若巧乳母養子有四事一者洗浴使淨二

者乳哺令飽三者卧寐安穩四者抱將出入恒使歡喜  
以此四事長養其子令得成就菩薩亦復如是有四事  
養育衆生一者以正法洗浴心垢二者以經法飲食使  
飽三者禪定三昧隨時與立四者以四恩饒益一切恒  
令歡喜以此四事勸誨一切長育衆生使得至道雜譬喻經

上

佛法為車弟子馬寶法寶主佛調御若馬出道失正轍  
如是當治令調伏若小不調輕法治好善成立為上道

若不可治便棄捨以是調御為無上

大智度論卷二

譬如工巧之人以藥力故能令銀變為金金變為銀

大智

度論卷十八

善欲隨心為說如船順流惡欲以苦切語教如以楫出

大智度論卷二十四

譬如人得好食良藥親里知識受諸病苦云何不與

大智

度論卷八十七

折世智之角杜異人之口導求珠之心開觀象之目救

燒灼於火宅拯沈溺於浪海故法雨降而燋種受榮慧

日升而長夜蒙曉

高僧傳卷八  
釋寶亮

雨甘露於豐草殖旃檀於江湄

弘明集  
卷十二

虛襟者挹其遺風漱流者味其餘津矣

弘明集  
卷十二

馬有五種第一見鞭影即時調伏第二得鞭乃伏第三

以利錐刺皮乃伏第四穿肌乃伏第五徹骨乃伏

羅什  
譯維

摩詰經  
積佛品

譬若惡蛇將取人食先吐毒沫在地人踐其上即時昏

熟不能起去然後以氣吸之三寶中作功德亦復如是  
初作功德時其事雖微冥益已深然後方便引入佛道

究竟涅槃其福乃盡

羅什譯維摩  
詰經弟子品

法音雷震開導萌芽猶春雷動於百草也

僧肇註維摩  
詰經佛國品

引導衆生入大乘海採取法寶使必獲無難猶海師善

導商人必獲夜光也

僧肇註維摩  
詰經佛國品

慢心自高如山峯不停水菩薩現為力士伏其高心然

後潤以法水

僧肇註維摩  
詰經佛道品

成名

人以顏狀為貌者則貌有衰落矣惟用榮名為飾表則稱譽無極也

史記游俠列傳論註

和氏之璞天下之美寶也待鑑識之工而後明毛嫱天下之姣人也待香澤脂粉而後容周公天下之至聖人也待賢師學問而後通

鹽鐵論殊路

水積成川則蛟龍生焉土積成山則豫樟生焉學積成聖則富貴尊顯至焉

說苑建本

士苟欲深明博察以垂榮名而不好問訊之道則是伐智本而塞智原也何以立軀也

說苑建本

劍伎之家鬪戰必勝者得曲城越女之學也兩敵相遭一巧一拙其必勝者有術之家也孔墨之業賢聖之書非徒曲城越女之功也成人之操益人之知非徒戰鬪必勝之策也故劍伎之術有必勝之名賢聖之書有必

尊之聲

王充論衡  
別通篇

尸子曰禹長頸鳥喙面貌亦惡矣天下從而賢之者好

金匱正言

卷九十五

學初學記帝王部  
總叙帝王註

近道名顯如高山雪

法句經  
廣行品

猶天有三光鼎有三足各稱其德並著其功

辯正論  
卷一



喻林卷九十五